

১০০০০ শ্রী শ্রী হক নাম ॥
১০/০৪/১৮.২.১০
ছহি বড় সোনাভান

সাএর
ছৈয়দ হামজা মরহুম সাহেব।
daccas

প্রকাশক
শ্রীযুক্ত ওলি উল্লাহ মিক্রা
মতওল্লী চণ্ডক মহজিদ-ঢাকা।

আমি এই কেতাব নিজ খরচের দ্বারায় ঢাকা চণ্ডকের
মসজিদের নীচে আমার আজিমী প্রেসে
প্রথম সংস্করণ মুদ্রিত করিলাম।

প্রিণ্টার শ্রীহামিদুররহমান খাঁ দ্বারা মুদ্রিত।

সন ১২ ১৭ সন।

মূল্য এক /০ আনা নাত্র ॥

১০০০০ শ্রী শ্রী হক নাম ॥
১০/০৪/১৮.২.১০
ছহি বড় সোনাভান

সাএর
ছৈয়দ হামজা মরহুম সাহেব।
daccas

প্রকাশক
শ্রীযুক্ত ওলি উল্লাহ মিক্রা
মতওল্লী চণ্ডক মহজিদ-ঢাকা।

আমি এই কেতাব নিজ খরচের দ্বারায় ঢাকা চণ্ডকের
মসজিদের নীচে আমার আজিমী প্রেসে
প্রথম সংস্করণ মুদ্রিত করিলাম।

প্রিণ্টার শ্রীহামিদুররহমান খাঁ দ্বারা মুদ্রিত।

সন ১২ ১৭ সন।

মূল্য এক /০ আনা নাত্র ॥

ছহি সোনাভান ॥

আল্লা ২ বল ভাই নবী কর সার ॥ নবীর কলেমা পড়ে হয়ে জাবে
 পার * আল্লা ২ বল ভাই জত মমিন গন ॥ মহান্নদ হানিফার কিছু
 শুন বিবরন * জতেক কহেল্লা পাইল হানিফা পাইলভান ॥ সে
 সব দুষ্কের কথা করিব বয়ান * বার জঙ্গ করে মর্দ মেতাবে খবর ॥
 তের জঙ্গ লেখা জায় টুঙ্গির সহর * সোনাভান নামে বিবি বাদসা
 সে সহরে ॥ কুওতের হদ্দ আল্লা দিয়াছে তাহারে ॥ এক রোজ
 সোনাভান কহেন উজিরে ॥ এয়ছা কেহ পারে জোরে পাছাড়ে আমারে
 উজির কহেন বিবি সোন সে খবর ॥ মহান্নদ হানিফা নামে আরব
 সহর * হজরত আলীর বেটা রছুলের নাতি ॥ আপনা কুওতে মর্দ
 ফেড়ে ডালে হাতি * বড়া জোড়গার মর্দ দুনিয়ার ভিতরে ॥ লড়িতে
 তাহার সাথে কেহ নাহি পারে * তাহার সহিত যদি চাহ লড়িবারে ॥
 কোমর বান্দিয়া চল মদিনা সহরে * সোনাভান বলে আমি জাব
 মদিনায় ॥ হানিফা কেমন মর্দ দেখিব তাহায় * মদিনার লোকে
 আমি বান্দিয়া আনিব ॥ তবেত আপন দেশে মুখ দেখাইব * একেলা
 জাইয়া যদি এ কাম নাকরি ॥ সোনাভান নাম আমি বৃথা তবে রাখি *
 উজির কহেন বিবি না কর বড়াই ॥ তার সাথে লড়ে কেহ দুনিয়াতে
 নাই * তকবরি জে কেহ করিল তার সাথে ॥ ছাজাই করিল তারে
 আপনার হাতে * আল্লার মেহের আছে হানিফা উপরে ॥ কেহ না
 আটিতে পারে দুনিয়া ভিতরে * সোনাভান বলে সোন উজির আমার
 আমি জে বড়াই করি আমার দেবতার * ঠাকুরের জোরে আমি করি
 এত জোর ॥ নহে বি বড়াই করি সাক্ষ্য কিবা মোর * এ কথা শুনিয়া
 আল্লা হইল বেজার ॥ কার খায় কার গায় বড় অবিচার * হানিফা
 খোণ্ডা দেখে পালছে সুইয়া ॥ টুঙ্গির সহরে জাও মেতাবি করিয়া *

সোনাভান নামে বিবি মদিনা সহরে ॥ জোরেতে ধরিয়া তুমি সাদি
 কর তারে * জোরের বড়াই করে নাদান আওরত ॥ আল্লাকে না চেনে
 মানে আপনার বোত * খোণ্ডাব দেখিয়া তুমি জদি থাক ঘরে ॥
 বেজার হইবে আল্লা তোমার উপরে * এমন খোণ্ডাব মর্দ দেখিল
 জখন ॥ নিন্দের খুমার গেল হইল চেতন * চারিদিকে চেয়ে দেখে না
 দেখে কাহারে ॥ ভাবিতে ২ আইল ঘরের দ্বারে * হানিফার মাতারি
 দেখিয়া হানিফায় ॥ পুছিল কি হাল বাবা কহ না আমায় * হানিফা
 কহেন বাত মায়ের জেনাবে ॥ বড় মুন্সিলের বাত দেখিহু খোণ্ডাবে
 হানুফা বলেন বাবা কি স্বপন শুনী ॥ কি লাগিয়া দেল তেরা এত
 পেরেমানী খোণ্ডাবের ভেদ কহে মায়ের হুজুরে ॥ সোনাভান নামে
 বিবি টুঙ্গির সহরে * জোরের বড়াই করে না চিনে খোদায় ॥ বেহায়া
 আওরত ফেরে ময়তানী দাগায় * মদিনাতে আসে বিবি বাকিয়া
 কোমর ॥ আমাকে জাইতে হৈল মদিনা সহর * ফাতেমা কহেন জদি
 এমন দেখিলে ॥ বিদায় করিহু জাহ আল্লা তেবে দেলে * এ কথা
 সুনিয়া মর্দ কোমর বাকিয়া ॥ ছালাম করিয়া চলে বিদায় হইয়া *
 এগানা বেগানা ছিল জত দোস্তদার ॥ তাহার আসিয়া কহে কিবা
 সমাচার * কি নাম কোথায় জাবে কহ পাহালওয়ান ॥ হানিফা স্বপন
 কথা করিল বয়ান * আল্লা জদি ফতে দেয় আসিব ফিরিয়া ॥ নহে এই
 দেখা সুন্য চলিহু করিয়া * এ কথা সুনিয়া সব লাগিল কান্দিতে
 দোণা দিল আল্লা জেন দেয় তেরা ফতে * ইয়ার সবার কাছে বিদায়
 লইয়া ॥ বাহির দালানে মর্দ পঙছিল আসিয়া * ডাকিয়া হুকুম করে
 সহসের তরে ॥ জিনবন্দি করে ঘোড়া এনে দেহ মোরে * সহিস
 শুনিয়া ঘোড়া করিয়া তৈয়ার ॥ জবরদস্ত ঘোড়া জিন বাকিল সোনার
 সোনার লাগাম তার দিয়া জানে মুখে ॥ নেজা গোর্জ তির তেগ
 কামান দুদিগে * সহিস আনিল ঘোড়া করিয়া সাজন ॥ হানিফা
 দেখিয়া খুসি করে মনে মন * বিছমিল্লা বলিয়া মর্দ ঘোড়ায় চড়িল ॥
 মায়ের নিকটে ফের আসিয়া পঙছিল * হানুফা কহিল বাছা নিধনের
 ধন ॥ মদিনা জাবার তরে করিলে গমন * এতেক কহিয়া বিবি লাগিল
 কান্দিতে ॥ হানিফা কহেন মাতা কহি কদমেতে * হাসেন হোসেন
 ভাই আছে দুই জন ॥ পাছে নাকি দাগা দেয় আসিয়া দুশ্মন * আপন
 খুসিতে মুখে দেহনা বিদায় ॥ সেতাব খবর আনি জেয়ে মদিনায় *
 মোলাকাত করি আমি দুই ভাইর সাথে ॥ দোণা কর মামা জিউ পাই

জেন ফতে * কি জানি দু ভায়ে জদি মারে দাগা দিয়া ॥ আফছো-
 ছের তিরে দিবে কলেজা ছেদিয়া * হুফা কহিল তুরে সুপিনু
 খোদায় ॥ সেতাব খবর লেহ জেয়ে মদিনায় * আলির ফরজন্দ তুমি
 আমার সেকমে ॥ সরম না পাও জেন রাড়ের মহিমে * মায়ের হুকুম
 লিয়া হানিফা মর্দানা ॥ মদিনা জাইতে মর্দ হইল রওানা * এলাহি
 ভাবিয়া মর্দ রাত দিন চলে ॥ কত দিনে মদিনা সহর গিয়া মেলে *
 রওজা মোবারকে জেয়ে ভেজিল দরুদ ॥ দোণা মাদ্দে নবী আগে
 ইমান সাবুদ * দোণা কর নানা নবি জাব মহিমেতে ॥ কোন রূপে
 ধরে আনি বেহায়া আওরতে * টুঙ্গির সহরে থাকে নাম সোনাভান ॥
 পিট পরে আপনি রহিবে মেহেরবান * আওরত বাদশাই করে সহিতে
 না পারি ॥ এই রূপে হানিফা মর্দ করে বড়া জরি * রওজা মোবারক
 হইতে বিদায় হইয়া ॥ ফাতেমা জোহরা জেথা পঙছিল জাইয়া *
 হাসেন হোসেন ছিল দহলিজে বসিয়া ॥ হানিফা ছালাম করে কদম
 চুমিয়া * হানিফার গলে ধরে মেলে দুইভাই ॥ খুসি খোসালিত দেলে
 হইল সবাই * হাল হকিকত পুছে হানিফা খাতির ॥ হানিফা স্বপন
 বাত করিল জাহীর * হাসেন হোসেন শুনে খোসাল অন্তর ॥ ফাতেমা
 বিবির আগে দিলেন খবর * শুনিয়া ফাতেমা বিবি ডাকিল মহলে ॥
 খুসির তুফান জেন বহে তার দেলে * হানিফা জাইয়া বোছা দিল
 কদমেতে ॥ ফাতেমা করিল দোণা দেল খোসালেতে * হকিকত জত
 সব পুছে হানিফায় ॥ হানিফা তামাম বাত কহিলেন নায় * স্বপনের
 কথা জত কহে ফাতেমারে ॥ শুনিয়া ফাতেমা বলে ভয় কর কারে *
 আওরত হইয়া জে করে এত জোর ॥ জাইয়া সাজাই কর ডর কিবা
 তোর * এ কথা শুনিয়া আল্লা হইল বেজার ॥ আজ কেন নাম বিবী
 ভুলিল আমার * খোড়েক সাজাই দিব হানিফার তরে ॥ দেখিব
 ফাতেমা বিবি কি করিতে পারে * হেথা সে হানিফা মর্দ খুসি খোসা-
 লিতে ॥ মায়ের খেদমত করে থাকি মদিনাতে * দুই চারী রোজ এছা
 গেল গোরিয়া ॥ এক দিন স্বপন দেখে বিছানে শুইয়া * সোনাভান
 নামে বিবি এসে ছরানায় ॥ হানিফার গায়ে হাত আসিয়া ফেরায় *
 হানিফা খোয়াবে কহে তুমি কোন জন ॥ টুঙ্গির সহরে থাকি কহিল
 স্বপন * সোনাভান নাম মেরা হিনু আরামেতে ॥ তোমার ছুর্ত আমি
 শুনিয়া কানেতে * সেই হইতে দেল মেরা আছে বেকারার ॥ টিকিতে
 নাপারী আইনু দেখিতে দিদার * কাম অনলেতে পুড়ে হৈনু ছারখার ॥

সকল জুড়াও মোর করিয়া বিহার * নহেত মরিব পুড়ে আসক
আগুনে ॥ হানিফা করিল তওবা হাত দিয়া কানে * কি कहিলে নাহি
কহ এমত কালাম ॥ বেপানা রাডের মুখ আমাকে হারাম * রছুলের
নাতি আমি আলীর ফরজন্দ ॥ ইহার লায়েক তুমি করিলে পছন্দ
তবে জদি নেকা বেহা হয় তেরা সাতে ॥ তবেত মনের আগ পারি
নিভাইতে * বিবী বলে তবে তুমি জাবে মোর দেশে ॥ দুজনে করিব
খুশি মনের আবেসে * তার পরে হানিফার নিন্দ গেল ছুটে ॥ সাহা
জাদি সোনাভান না দেখে নিকটে * হায় ২ করে মর্দ উঠিল কান্দিয়া
কোথা গেল সাহাজাদি আমারে তেজিয়া * কবে ফের মোলাকাত
হবে তার সাত ॥ তুতি জবানের মত কে শুনাবে বাত * জে রূপে
দেখিছ আজ না দেখি কোথায় ॥ টুঙ্গীর সহরে জাব যা করে খোদায়
বসিয়া রহিল মর্দ হইয়া দেলগীর ॥ উঠিয়া চলিয়া গেল হইয়া বাহির
কারে না कहিয়া মর্দ ঘোড়ায় চড়িয়া ॥ হাতিয়ার পোশাগ লিয়া চলে
নেকলিয়া * কত দূর গিয়া মর্দ রাহা চুড়ে ফেরে ॥ কেমনে জাইব
আমি টুঙ্গীর সহরে * কোন রাহে গেলে পাব বিবীরে দেখিতে ॥
মলাকাত কেনেতে হবে তার সাতে * কিছু না ঠেকানা পায় ভাবে
দেলে ২ ॥ পরার ছাড়িয়া এবে ত্রিপদীতে বলে *

—••ঃ*○(*)○*ঃ••—

ত্রিপদী ॥ হানীফা একেলা পথে, ভাবে জাব কেনেতে, কে মোরে
দেখায়ে দিবে রাহা ॥ আল্লা বীনে নাহি গতি, সেইত সজ্জের সাতী,
তাহা বিনে নাহি মোর চাহা * রাখ মার সব পার জোর নাহি চলে
কার, তোমার মহিমা সে অপার ॥ দয়া জদি কর বারি, তবেত জাইতে
পারি, নহে কিবা যোগ্যতা আমার * এই রূপে জোড় হাত, করে মর্দ
মনাজাত, একিদাতে আল্লার দরগায় ॥ এলাহি হইল সখা, এক মর্দ
পাইল দেখা, খেজেরের মত সে রাহায় * জুব্বা পিরহান গায়, খড়ম
আছিল পায়, তছবি গলে আসা জে মুছার ॥ হানিফারে দেখে মর্দ
দেলেতে, পাইয়া দর্দ, পুছে কেন আছে লাচার * হানিফা বলেন
পীর, পেরেসান জে খাতির, সোন তুঝে कहি সে খবর ॥ সোনাভান
বিবি নাহি, তাহার আসক আমি, যর তার টুঙ্গীর সহর * খোওাবে
দেখিয়া তারে, যরে না বলিয়া কারে, আইবু এই ময়দান বীচে
কোন দিগে যর তার, নাই জানী সমাচার, এ খবর পুছি কার কাছে
আপনী মেহের করে, জান জদি कह মোরে, তবে প্রাণ বাচে যে আমার

কহে পীর হানিফারে, জাবে জদি সে সহরে, থাকে পিবে কি আছে
তোমার * ছয় মাস ময়দানেতে, লোক জন নাহি পথে, জাবে তবে
পাবে সে সহর ॥ হানিফা শুনিয়া কয়, মনেতে পাইয়া ভয়, থাক কিবা
সঙ্গে নাহি মোর * পীর বলে জাহ ঘরে, বলে আইস সবাকারে, আর
আন খাবার খোরাক ॥ এই রাহে জাহ তুমি, দেলে না করিবে গমি
দেলে ভেবে জাহ আল্লা পাক * খাব পিব নাহি মাতে, ঘরে জাব
কেমনেতে, সরম হইবে বড় তায় ॥ হেঙ্কত করিয়া দেলে, আপনা
ঘোড়াকে বলে, চলে জাব জা করে খোদায় * শুনরে দুলদুল ঘোড়া,
জোড় তুমি কর খোড়া, হয় তবে মতলব হাছেল ॥ ছয় মাসের রাহা
গুনে, জেতে পার ছয় দিনে, তবেত খোশাল হয় ফেল * শুনিয়া
দুল ২ ঘোড়া, খুসিতে কুদিল বড়া, হানীফা সওয়ার হৈলতায় ॥ ঘোড়াকে
এসারী করে, চলে ঘোড়া বাও ভরে, রাত্র দিন না থাকে কোথায় *
ছয় রোজ রাত দিনে, ছয় মাসের রাহা গুনে, গেল মর্দ টুঙ্গির সহর ॥
সহরের বিচে গিয়া, ঘোড়া হৈতে ওতরিয়া, খোলে মর্দ আপন কমর *
ঘোড়া মাঠে চরে খায়, হানিফা বাজারে জায়, খায় মর্দ রুটি ও কাবাব
সেকম হইল পোর, গায়েতে হইল জোর, গাছ তলে পড়িল সেতাব *
নিদ্র জায় গাছ তলে, শুইয়া খোশাল দেলে, তার পরে পাইল চেতন
সহরে ফিরিতে জায়, মহল দেখিতে পায়, ভাল ঘর দেখে খুসী মন *
গাথিয়াছে প্রার্থরেতে, সোনা রূপার থাম তাতে, রতন কাঞ্চন দিয়া
তায় ॥ ঘরের ছানানা জত, তাহা বা কহিব কত, এক মুখে বলা নাহি
যায় * তামাসা দেখিয়া ছারে, ফিরে আসে তার পরে, বৈসে সেই
গাছের তলায় ॥ চেয়ে দেখে চারী পানে, বুড়ি এক সেই খানে, সেই
রাহে বাজারেতে জায় * বুড়ি যদি আইল কাছে, হানিফা তাহারে
পোছে, কোথা জাবে কহ বুড়ি পীর ॥ বুড়ি বলে বাজারেতে কড়ি
পয়সা লিয়া মাতে, জাব বাবা শুন মোছাফির * হানিফা বলেন বুড়ি
লিয়া জাও কত কড়ি, শুনে বুড়ি বলে তিন পন ॥ অধিন ফকির বলে
রছুলের পাওতলে, মিছা কামে গেল এ জীবন *

পয়ার ॥ হানিফা বলেন বুড়ি জাহ বাজারেতে ॥ তিনপন কড়ি লিয়া
কি কিনিবে তাতে * মোর এক কাম যদি পার করিবারে ॥ সোনা
রূপার অলঙ্কার পরাব তোমারে * বাজারে জাইতে তবে না হইবে
আর ॥ ঘরে বসে খেতে পাবে জা হবে দরকার * এ কথা শুনিয়া বুড়ি
খুসি হয়ে দেলে ॥ তিনপন কড়ি ছিল সবদিল ফেলে * বুড়ি কহে কহ

বাবা কি কাম করিব ॥ যে কাম করিবে বাবা এখনি করিব * হানিফা
 বলেন বুড়ি সোন মেরা বাত ॥ সাদি দিতে পার কি না সোনাতানের
 সাত * খুব ভাতে নেওজিব তোমার খাতির ॥ যাহা চাবে তাহা এনে
 করিব হাজির * একথা সুনিয়া বুড়ি চলিল তখন ॥ সোনাতানের
 নিকটেতে দিল দরশন * কান্দিতে ২ বুড়ি যায় ধিরে ২ ॥ সোনাতান
 জান দিয়া পুছিল তাহারে * সোনাতান বলে কেন কান্দ জারে জার
 কেবা তুঝে দিল বুড়ি এমন আজার * বুড়ি বলে সোনাতান আরজ
 আমার ॥ মেহের থাকিলে তেরা কে দিবে আজার * কোন বাটে দুনি-
 য়াতে নাহি পেরেসানী ॥ তোমার লাগিয়া আমি ভাবি রাত দিনে *
 জওনী ওয়াদে তেরা দেখে ভাবি আমি ॥ এমন বয়সেতুমী না ভজ
 সওামী * সোনাতান বলে তুমী নাকান্দিও আর ॥ মুল্লুকে ২ আমিদিছি
 সমাচার ॥ দেশে ২ পরওনা দিয়াছি পাঠাইয়া ॥ আমাকে চাহিয়া কুলিন
 না পাবে ছুড়িয়া * আমার চাহিয়া রূপ জেয়াদা জে ধরে ॥ কুলেতে
 কুলীন হয় জোরেতে পাছাড়ে * জোরেতে জেয়াদা যেই পাছাড়িবে
 মোরে ॥ সওামী মেহবে মোর ভজিব তাহারে * বুড়ি বলে সোনাতান
 বলি তেরাপায় ॥ রূপে ওনে এক মর্দ দেখিহু রাহায় * তোমার চাহিয়া
 রূপ দেখিতে তাহার ॥ সম্বন্ধ করিয়া দিব মনে যদি লয় * সোনাতান
 বলে রূপ দেখিলে নয়নে ॥ আমার চাহিয়া জোর জানিলে কেমনে
 বুড়ি বলে দেখিহু যে উচা বড়া মান ॥ এখাতেরে তেরা আগে করিহু
 বয়ান * সোনাতান বলে বুড়ি চেন তুমি তারে ॥ কি নাম তাহার সেই
 থাকে কোথা কারে * বুড়ি বলে আমি তার নাজানী থবর ॥ বিবী বলে
 পুছ গিয়া থাকে কোন সহর * কি নাম তাহার আর কোন কুলে জন্ম
 মেতাবী জানীয়া তুমি আইস তার নর্থ * এই সব সমাচার কহিবে
 আমারে ॥ সাদির কারার তবে দিবজে তোমারে * এতেক সুনিয়া তবে
 করিল গমন ॥ হানিফার আগে গিয়া দিল দরশন * হানিফা দেখিয়া
 পুছে কহ সমাচার ॥ জে কামে ভেজীহু তুঝে কি হইল তার * বুড়ী
 বলে আগে তুমি দেহ পরিচয় ॥ সুনিয়া তোমার কুল রাজী যদি হয়
 হানিফা কহিল তারে আপনার নাম ॥ আলী, ফরজন্দ আমি মদিনা
 মোকাম * রছুলের নাতী আমি জাতে মুছলমান ॥ জাইয়া থবর দেহ
 জেথা সোনাতান * বুড়ি বলে বাবা তুমি যে কহিলে কথা ॥ সুনিয়া
 সে সাহাজাদী কেটে লিবে মাথা * তুমি হৈলে মোছলমান তারা ভ
 ব্রাহ্মণ ॥ তেরা সাতে সাদী হবে এ কথা কেমন * হানিফা কহেন মুঝে

জামাল সোনাভান ॥ স্বপনের কথা জত করিল বয়ান * সোনাভান
আসকেতে থাকিতে না পারে ॥ এক রাত্র গিয়াছিল আমার হুজুরে *
এঘাদ দেলাবে তারে এই সব বাত ॥ খোসাল হইয়া তুষে দিবেন
খেলাত * এ কথা শুনিয়া বুড়ি করিল গমন ॥ সোনাভানের আগে
গিয়া দিল দরশন * বুড়িকে দেখিয়া পুছেবিবী সোনাভান ॥ জে লাগিয়া
গেলে কহ তাহার বয়ান * বুড়ী বলে সোনাভান সোন সে খবর
আলীর ফরজন্দ ঘর মদিনা সহর * হানীফা তাহার নাম রচুলের নাতী
হাছেন হোসেন তাই মোছলমান জাতী * ছুরত জামাল মর্দ বড়
পাহালওয়ান ॥ জাতের কুলীন সেই তোমার সমান * সোনাভান বলে
বুড়ী সোন মেরা বাত ॥ মাদির উকিল হয়ে পাইলে কি খেলাত *
বুড়ী বলে সোনাভান সোন সমাচার ॥ সেই মর্দ দিবে মোরে অর্থ
অলঙ্কার * তাড়বালা বাজুবন্দ গলায় হাসলি ॥ সিতে পাটি চল্লেখার
পায়েতে পাসলি * কানে কান বালা দিবে গলে দিবে হার ॥ হাতে
চুড়ী পৌছি আর পাজেব সোনার * সোনাভান বলে বুড়ী তাহা পাবে
পিছে ॥ মাদির খেলাত আগে লেহ মেরা কাছে * বুড়ী বলে বিবী
তেরা আগে হোক বেহা ॥ ~~তাহা বাদে দিবে তেরা দেল চাহে জাহা~~
সোনাভান বলে বুড়ী এমন কত হয় ॥ খালী হাতে কেননেতে করিব
বিদায় * এহা বলে সোনাভান ডাকে দাসী গনে ॥ এহার খেলাত সব
দেহ জনে ২ * এমন খেলাত দিবে থাকে কত দিন ॥ জত দিন বাচে
জেন থাকে তার চিন * একথা শুনিয়া জত ছিল দাসী গন ॥ চড় ঘুসা
নাঠি মোটা মারে জনে জন * কেহবা মাথার চুল ফেলে ওখাড়িয়া ॥
কেহবা চাবুকে পিট দিল ফাটাইয়া * বুড়ী বলে সোনাভান মাতার
সমান তুনি ॥ আর না তোমাকে এই বাত কব আমি * ছেড়ে দেহ
সাহাজাদী না হবে বৈমুখ ॥ মরে গেহু হায় ২ ফেটে জায় বুক * হুচিয়া
ছেরের বাল চুন কালী গালে ॥ কোলকে পুড়িয়ে দিল বুড়ীর কপালে
মরিবার মত বুড়ী কান্দিতে না পারে ॥ ধরাধরী করে ফেলে বাড়ীর
বাহিরে * কতক্ষণ বাদে তবে পাইল চেতন ॥ হানীফার আগে গিয়া
দিল দরশন * হানীফা কহেন বুড়ী কহ সমাচার ॥ জার তরে গেলে
ডুমি কি হইল তার * বুড়ী বলে ভাল কানে পাঠালে আমায় ॥ জেওর
তফাতে থাক জান বাচা দায় * চড় ঘুসা নাঠি মোটা মারে কত শত
মাথা মুড়াইয়া চুন কালী দিল কত * বড় আসা দিয়া মোরে করিলে
উকিল ॥ ভাদুরে তালের মত মারে কত কীল * হেথা জেন বেচে

আইন করিয়া ফিকীর ॥ কেমনে দেখাব মুখ নিকটে স্বামীর * মজুরী
করিয়া আনে কড়ি তিন পন ॥ পুছিব কি হইল কড়ী কি কব তখন
জে মার মারীল দাগ আছেত বদনে ॥ নেড়া মাথা লিয়া ঘরে জাইব
কেমনে * খালী হাতে কেমনেতে ঘরেতে জাইব ॥ কি খাইব সত্তামাকে
কিবা খেতে দিব * একথা বলিয়া বুড়ী কান্দে জারে ॥ হানীফা খাতের
জমা করিল তাহারে * হাতের অঙ্গুরী যে খুলীয়া আপনার ॥ বুড়ীকে
শুপীয়া দিল করিতে বাজার * বেচিয়া বাজার করে খাও বুড়ী মাই ॥
আল্লা চাহে এই দেশে করিবে বাদসাই * বুড়ীকে বিদায় দিয়া হানীফা
মর্দানা ॥ ঘোড়ার সওয়ার হইল ভাবীয়া রক্বানা * হাজার মোনের গোর্জ
বগলে দাবীয়া ॥ বাজারের রাহে মর্দ খাড়া হৈল গিয়া * গোস্বায় অভূদ
কাপে দোন হাথী লাল ॥ কি রূপে ঝগড়া হবে ভাবে সে খেয়াল *
সোনাভানের দাসী যত রূপের শুন্দরী ॥ জল আনিবারে সবে জায়
সারি ॥ * হানীফা পুছেন বাত জত দাসী গনে ॥ কোথা হৈতে আইলে
জাইবে কোনখানে * দাসী গন বলে আছে সোনাভান বিবি ॥ তাহার
লাগিয়া জল আনিব সেতাবী * সোনাভান নাম যবে হানীফা সুনিল
বাকুদের ঘরে যেন আগ লাগাইল * সকলের কলসী যে ডালিল
তুড়িয়া ॥ তামেচা মারিয়া দিল গাল ফাটাইয়া * বেহন্দ খাইয়া মার
জায় গড়া গড়ি ॥ বিবিকে জাইয়া কেহ বলে দড় বড়ি * শুন বিবি সাহা
জাদি আরজ আমার ॥ এক মর্দ আসিয়াছে বড়ই গাটার * সোনাভান
দাসীর মুখে শুনিয়া এহাল ॥ ভালত উকিল বুড়ী বাধালে জঞ্জাল *
সোনাভান বলে দাসী সুনহ ফরমান ॥ সেতাবী আনিয়া দেহ করিব
জলপান * এ বাত সুনিয়া দাসি করিল গমন ॥ কলসী ভরিয়া আনে
দুধ বিসমন * দুধে জলে ত্রিসমন করিল জলপান ॥ আসীমন থানা পুন
খায় সোনাভান * হাজার মনের গোর্জ তুলে নিল হাতে ॥ আছিল
লোহার জেরা পরিল গায়েতে * সিদ্ধার করিয়া বিবী বামে বাক্কে খোপা
তার পরে তুলে দিল গন্ধরাজ চাপা * আছিল লোহার টোপ তুলে
নিল ছেরে ॥ নেজা গোর্জ তলওয়ার ঢাল পিট পরে * রাহেতে চলিল
দন্ত করে কড় মড় ॥ এমন জোরেতে চলে বহে জেনা বাড় * গাছ পালা
হাতী উট যা পায় সমুখে ॥ ওখাড়িয়া ডালে সব ধন্দ লাগে দেখে *
সওয়ার হইয়া বিবি ঘোড়ার উপরে ॥ ময়দানে চলিল বিবি হানীফা
হজুরে * হানীফারে দেখে হাক মারে সোনাভান ॥ হুমিয়ার হৈল মর্দ
হানীফা পাহালওয়ান * হানীফা বলেন সুন নেহায়া আগরত ॥ মর্দ

সামনে হাক এমন হেস্মত * ফুক শিশি মত জেন আওরতের জাত ॥
 সহজে টুটীবে মান গায়ে দিলে হাত * ফুক শিশি ফুকে ভাঙ্গে আও
 রত তেমত ॥ দেখিলে বেগান মর্দ না থাকে হোরমত * জুবা নারী
 হয়ে তুমি আইলে বাহিরে ॥ যৌবন কামের জালানার সহিবারে *
 নাহিকলজ্জারভয় এলে মহিমেতে ॥ পাইহু সেকার আজনা দিবজাইতে
 সোনাতান বলে নেড়ে কর তকবরি ॥ আসিয়া আমার সাথে কর বড়া
 জুরী * চাকরের মত নও হতে চাও সওয়ামি ॥ এখনি বুঝিবে তুমি জার
 জে মর্দমি * বটের সমান তুমি ফের ডালে ॥ আসিয়া ঠেকিলে আজ
 বাঘের জঙ্গলে * হানীফা বলেন সোন বেহায়া আওরত ॥ বটের সমান
 বল এতেক হেস্মত * আমি জদি বট হৈহু তুমি হইলে গাড়ী ॥ ধরিয়া
 মাথার চুল লয়ে জাব বাড়ী * সোনাতান বলে নেড়ে সোনহ ফরমান
 তোমার আজল আমি বুঝিহু নীদান * হানিফা বলেন সুন কাফেরের
 জাত ॥ আমাকে জে নেড়ে বল এতেক হেস্মত * দিনের এহলাম
 আমি তুমি বল নেড়ে ॥ তুইজার বান্দি তারে আনিয়াছি ধরে * ভোর
 চেয়ে ভাল নারী আছে মোরমারে ॥ বান্দি যে করিবতার আসিএখাতীরে
 বপনে আমার কাছে কেন গেলে তুমি ॥ এখাতীরে তেরা দেমে আইহু
 জে আমি * আপনী কারার দীলে জেয়ে মদীনায় ॥ তোমার কারারে
 আমি আইহু হেথায় * এতেক সুনিয়া বলে বাবী সোনাতান ॥ এতেক
 মকর জ্ঞান হৈয়া মোছলমান * নকা মদীনা আমি কভু দেখি নাই
 তেরা সাথে কবে দেখা হইল কোন ঠাই * এই সব দমে কত নারী
 ছুলাইলে ॥ তেমন আহমক বুঝি আমাকে পাইলে * মল্লিকা সমর্জ
 ভানে দুজনে ধরিয়া ॥ তাহাতে তোমার দেল গিয়াছে বাড়িয়া * বরুন
 রাজার কণ্ঠা সম্বন্ধে বহিনী ॥ হেকমত ধরিলে তারে আমি খুব জানি
 হানিফা কহেন বিবী ভালত কহিলী ॥ তাহার সম্বন্ধে তুমি হৈলে মোর
 শালি * শালি হয়ে এত তুমি কর লানতান ॥ শুনিলে বহিনী তেরা
 হবে অপমান * তেরা সাথে আরমোর কিসের ঝগড়া ॥ বহিনীর সাথে
 থাক চল খাড়া ॥ মোসলমান হও তুমি কলেমা পড়িয়া ॥ দুই জনে
 এক সাথে রবে খুসি হৈয়া * সোনাতান বলে নেড়ে না কর বড়াই ॥
 এখনি ধরিয়া তুঝে করিব সাজাই * হানিফা কহেন বিবী না কণ্ঠমান
 এখমি কাটাযে কেন আপনা গর্দান * সোনাতান বলে আইলে আলি
 পাহানওয়ান ॥ তবু না কাটীতে পারে আমার গর্দান * হানিফা কহেন

তুমি তারি বেহেছাব ॥ স্বপ্নের নাম ধর স্নিতে খারাব * আশিত
 বহু হব তিনিত স্বপ্ন ॥ স্বপ্নের নাম ধর সত্তা মি হুজুর * একথা
 শুনিয়া বিবী গোদায় জলিল ॥ আছমান হইতে জেন বনবানা গিরিল
 আসিয়া ধরিল বিবী হানীফার কোমর ॥ দুই জনে খেচাখেচি করে বড়
 জোর * মারামারী ছড়া ছড়ী ধরে গলে ॥ এখন হোরমত কোথা
 পাহালওয়ান বলে * গলাগালি কোলা কোলী হইল জখন ॥ আর কি
 বাকী আছে বলহ এখন * সোনাভান বলে নেড়ে লড়াই করিতে ॥
 এবাতে কলঙ্ক নাই হয় কার জাতে * এই বার বাচ তুমি মউন্তের
 হাতে ॥ সাদীর এরাদা তবে করিবে দেলেতে * এত বলি হানীফার
 ধরিল কোমর ॥ ওঠাইয়া ঘোমাইল ছেরের উপর * বীবি বলে মারী
 জদী মারিয়া কাছাড় ॥ থান হৈয়া জাবে হানীফার হাড় * এবাতে
 কলঙ্ক হবে কহীবে সংসারে ॥ আওরত হইয়া মারে মরদের তয়ে *
 এহাকে ফেলীয়া দীব মদীনা সহরে ॥ এত বলে হানীফাকে ফেকে দিল
 জোরে * হানীফার তরে আল্লা দেখিলে মুশ্বিল ॥ তখনই হুকুম করে
 ডাকীয়া জিবরিল ॥ হানীফা শুন্তেতে জায় মদীনা তরফে ॥ সেতাবী
 জাইয়া ওছে ধর গিয়া লুফে * মায়ের কোলেতে জেন লাড়কা দুখ
 খায় ॥ হানীফাকে সেই মত রেখ মদীনায় * জীবরিল শুনিয়া তবে
 ধরে ধীরে ॥ আছানে রাখিয়া দিল মদীনা সহরে * চেতন পাইয়া
 মর্দ দেখে তাকাইয়া ॥ মদীনা সহরে জে কে গেল রাখিয়া * হানীফা
 কহেন আল্লা দিলে এত দুখ ॥ কেমনে সবার কাছে দেখাইব মুখ *
 কেমনে দেখাব মুখ তাই বেরাদরে ॥ কি বলে জাইব আমি মায়ের হুজুরে
 এই সব ভেবে গুনে দেখিল বিস্তর ॥ আর না জাইব আমি মদীনা সহর
 সরম ভরম আল্লা তেরা এন্তেয়ার ॥ হেথা হৈতে তরাইতে কেহ নাই
 আর * আওরতের হাতে আমি হইব সরমেন্দা ॥ বেচে আর কি বা স্বপ্ন
 হইয়া নামোরদা * আলীর করজন্দ আমি রছুলের নাতী ॥ কাতেমার
 বেটা হয়ে করিব অখ্যাতী * এলাহী মওত জদি দিত এই হালে ॥
 ভাবনা আন্দেসা মোর না রহিত দেলে * জা করে এলাহী আল্লা
 কপালে আমার ॥ এখন জাইব ফের টুঙ্গীর সহর * এয়ছা জোরে চলে
 জায় কিছুই না মানে ॥ ছয় মাসের পথ মর্দ গেল ছয় দিনে * খানা
 পিনা নিন্দ কিছু নাই রাহা পরে ॥ দেখেন দুলাই চরে রাহার উপরে *
 হানীফাকে দেখে ঘোড়া চলিল কুদীয়া ॥ খোসাল হইল মর্দ ঘোড়ার
 দেখিয়া * হাত ফেরাইল ফের দুলা দুলের পায় ॥ সত্তার হইয়া মর্দ

মরদানেতে জায় * হাকিল হয়দরি হাক হানিফা মর্দানা ॥ হাকের
আওজ শুনেকাপে সর্বজন * কানেতালা লাগে ভাই শুনিয়া মেহাক
হাতি ঘোড়া উঠ ভাগে দেখিয়া বিপাক * সোনাভান বসে ছিল
ভক্তের উপরে ॥ বেহুস হইয়া বিবী জমিনেতে গেরে * খোড়া ঘড়ি
বাদে কিছু হুস হইল তারে ॥ কহিল কি অবতার আইল সহরে *
উজির কহিল সেই হানিফা মর্দানা ॥ আপনী ফেলিলে জারে সহর
মদিনা * ফিরীয়া আইল মর্দ বান্দিয়া কোমর ॥ আসিয়া হয়রান করে
তামাম সহর * একথা শুনিয়া বিবী ভাবিতে লাগিল ॥ হুণ্ডা রোজে
কেমনেতে ফিরীয়া আইল * না হবে হানিফা বুঝি কাজে গেল জানা
এখনি জাইব দেখি কেমন মর্দানা * কোমর বান্দিয়া বিবী এল
মরদানেতে ॥ হানিফা আছিল খাড়া পাইল দেখিতে * হানিফা জে
সোনাভানে দেখিবারে পায় ॥ আসিমন লোহার কড়া দিয়া আসে পায়
দশ মন লোহার টোপ দিয়াছে মাথায় ॥ আটমন লোহার জেরা
পিন্দিয়াছে পায় * সোনাভান বলে সোন বিদেশী ছওর ॥ কোথা
হইতে আইলে তুমি কি নাম তোমার * পাহালওয়ান কহে বিবী নাহি
চেন তুমি ॥ হানিফা আমার নাম তোমার সওয়ানি * বিবী বলে নেড়ে
তেরা না হইল সরম ॥ কোমর মুখে কথা কহ কিসের ভরম * হানিফা
কহেন মেরা সরমে কিকরে ॥ টাকিতেনা পারী আমি দেখিয়া তোমারে
তোমার লাগিয়া বান বিকলীল বুকেতে ॥ কেন তুমি দেখা দিলে জেয়ে
মরদানেতে * মিনতি করিয়া গেলে পিছেতে নিদয়া ॥ মনে বুঝে দেখ
বিবী কে হল বেহায়া * সোনাভান বলে নেড়ে কত জান মায়া ॥
চাপড়ে ভাঙ্গিব দাত সুনরে বেহায়া * হানিফা বলেন সুন বেহায়া
আওরত ॥ বেদাওতে পেয়ে মুখে বাড়িল হেফত * জবান দাবিয়া
বাত কহরে বৈতাল ॥ নহেত পয়জারে তেরা উঠাইব খাল * সোনা
ভান বলে তেরা মদিনা সহর ॥ তামাম আইলে পরে কি করিবে মোর
জারে তুমি ভয় কর তারে জদি পাই ॥ পাহালওয়ানি কারে বলে এখনি
সিখাই * হানিফা এবাত সুন কাপে থর ॥ মারিল তামেচা তার
মুখের উপর * এয়ছা জোরে চড় মারে তাহার মুখেতে ॥ সামালিতে
নারে বিবী গেরে জমিনেতে * মরিবার হাল হৈল নাকেতে নিশাশ
দেল থেকে উঠে গেল বাচিবার আস * খোড়া ঘড়ী বাদে কিছু হুস
হৈল তারে ॥ হানিফা ধরিয়া হাতে তোলে ধিরে * কান্দিতে লাগিল
বিবী হইয়া আকুল ॥ তামাম জাহান দেখে সরিসার ফুল * বিবী বলে

এক চড়ে হইল কাতর ॥ আজ জে হানিফা মর্দের দেখি বড় জোর *
 খোড়া ঘড়ি বাদে বিবী উঠে সামালিয়া ॥ কোমর বান্ধিয়া বিবী মজবুত
 করিয়া * গজিয়া উঠিল বিবী জেন সের নর ॥ গোম্বাদেল হয়ে চলে
 হানিফা উপর * আহমান জমিন কাপে এয়ছা জোর করে ॥ হাওাতে
 মিশিয়া জেয়ে হানিফারে ধরে * হানিফা দেওয়াল তার ধরিল খেচিয়া
 দুইজনে ছড়াছড়ি মস্ত হাল হৈয়া * রাত দিন করে জঙ্গ কিছু নাই
 খায় ॥ এইরূপে আট দিন গোজারিয়া জায় * কেহ কারে নাহি পারে
 সমানে সমান ॥ হানিফার আগে গিয়া কহে সোনাভান * মিছে কেন
 জঙ্গ করে মরি দুই জন ॥ দোহে বরাবর হব না হবে মরণ * হানিফা
 কহেন কেন জঙ্গে ভঙ্গ দেহ ॥ মরদ রাড়ের হাতে হারে নাহি কেহ *
 সোনাভান বলে নেড়ে না শুনিলে মানা ॥ বুঝিলাম তোমর পরে বিধি
 বিড়ম্বনা * এবার কাবুতে পেল দেখিব তোমারে ॥ একবারে পাঠা-
 ইয়া দিব জয় ঘরে * সোনাভান বলে নেড়ে মোরে কেবাপারে ॥ শিব
 আর জয় কালী আছে মোর ঘরে * তার জোরে লড়ি আমি কারে করি
 ভয় ॥ এখনি দেখিবে তেরা নছিব কি হয় * হানীফা বলিল বিবী
 সোন সমাচার ॥ আমি জে বড়াই করি জোরেতে আমার * জখন
 হানিফা মর্দ বড়াই করিল ॥ আরসে থাকিয়া আল্লা বেজার হইল *
 জিবরিলে কহেন বাত আল্লা পরওয়ার ॥ হানিফা আমার পরে নাহি
 রাখে বার * আপনা জোরের মর্দ করিল বড়াই ॥ উচিত মতন ওরে
 দিবজে সাজাই * মস্ত হালে লড়ে দোহে কেহ নাহি হারে ॥ সোনা-
 ভান গোম্বা ভরে হানিফারে ধরে * এমন জোরেতে বিবী ধরিল
 কোমর ॥ এক বারে উঠাইল মাথার উপর * খুমাইয়া ছের পরে
 বগলে দাবিয়া ॥ কহিল কাটিব আজি হানিফারে লিয়া * শিব আর জয়
 কালি আছে মোর ঘরে ॥ নরবলি দিব আমি তাদের হুজুরে * এতবলি
 হানিফারে লিয়া গেল ঘরে ॥ বলিদান দিতে চাহে শিবের হুজুরে *
 শিব বলে সোনাভান সুন দিয়া মন ॥ বলিদান দেও তুমি কাহার নন্দন
 সোনাভান বলে ঠাকুর করি নিবেদন ॥ হানিফা ইহার নাম আলির
 নন্দন * ভাই দোন এমাম যে নাতি রছুলের ॥ নরবলি দিতে আনি
 আনি এখাতের * শিব বলে সোনাভান সোন শীঘ্র গতি ॥ হজরত
 আলির বেটা রছুলের নাতি * এহারে খাইতে দেহ জাহা খেতে চায়
 এহারে মারিতে পারে কে আছে দুনিয়ায় * সোনাভান হানীফাকে
 বগলে দাবিয়া ॥ জয়কালির নিকটেতে পড়িছিল জাইয়া * সোনাভান

বলে মাগো সোন জয় কালি ॥ আত্মা কর গুণো মাতা দেই নরবলি *
 জয়কালি বলে বিবী সোন সমাচার ॥ নরবলি দিতে চাহ ফরজন্দ কাহার
 বিবী বলে নাম এর হানিফা মর্দানা ॥ আলির ফরজন্দ ঘর মহর মদিনা
 কালি বলে সোনাভান শুন সমাচার ॥ বরুন রাজার কণ্ঠা মল্লিকা আকার
 তাহার সঙ্গেতে মর্দ লড়িয়ে বিস্তর ॥ বন্দ করে রেখেছিল কুণ্ডার ভিতর
 খবর পাইয়া আলী আইল তার পিছে ॥ মার ২ বলে আইল মহলের
 বিচে * শিব দেখে পালাইল আলী পাহালগানে ॥ আমি গিয়া লুকা
 ইয়া রহিলাম বনে * বরুন রাজার মেয়ে লইল ধরিয়া ॥ মোছলমান
 করে তারে ফলেমা পড়াইয়া * সেই আলীর বেটা এই কে খাইবে
 ধরে ॥ মনে হৈলে জার নাম কাপি ধরে ২ * সেই হাতে পালাইয়া
 আইনু এই ঠাই ॥ নাহি জদি শুন তবে হেথা হৈতে জাই * হানিফারে
 শিব কালী না করে কবুল ॥ হানিফা দেলেতে ভাবে আল্লাহো
 রছুল * কাফেরের হাতে আমি হৈনু পেরেসান ॥ এইবার তরাইয়া
 লেহ ছোবহান * মা বাপের সাথে আর না হইল দেখা ॥ মরিব রাড়ের
 হাতে এই ছিল লেখা * সোনাভান বলে নেড়ে ভাব কিবা মনে ॥
 মদিনা মহরে আর জাইবে কেমনে * দেবির নিকট হৈতে বিদায়
 হইল ॥ তেজধার ছুরি বিবী নেকালিয়া নিল * কি কব ছুরীর কথা যেন
 হিরার ধার ॥ হানিফা দেখিয়া ছুরি কান্দে জার ২ হানিফারে সোনা-
 ভান বগলে দাবিয়া ॥ বড় এক ময়দানেতে পড়ছিল জাইয়া * পটকান
 মারিয়া তারে ফেলে জমী পরে ॥ বসিল জাইয়া তার ছাতীর উপরে
 এমন জোরেতে বসে বুকে লাগে বেথা ॥ কাতর হইয়া হানিফা কহে
 এই কথা * একবার ওঠ বিবী এ দুনিয়া দেখি ॥ এ জনমের মত আমি
 আল্লা বলে ডাকি * এত বলে পাহালগান কান্দে জার ২ ॥ বাপমার সাথে
 দেখা মা হইল আর * হাসেন হোসেন ভাই কোথায় রহিলে ॥ দেখা
 জদি দিতে ভাই মউতের কালে * এতেক বলিয়া মর্দ লাগিল কান্দিতে
 সোনাভান ছুরি তার ধরিল গলাতে * আহমান জমীন কান্দে হয়ে
 জারে জার ॥ গাছ পালা আদি কান্দে জতেক জানওয়ার * পক্ষু পক্ষি
 গন কান্দে হইয়া স্থির ॥ দরিয়ার জানওয়ার কান্দে হাঙ্গর কুস্তির *
 হানিফার গলে ছুরি চাহে ঢালাইতে ॥ না কাটে পশম এক আল্লার
 হৃদয়েতে * বহুত হেকমত করে দেখে সোনাভান ॥ না পারিয়া ফিরে
 বিবী হয়ে পেরেসান * হানিফা একেলা পড়ে রহিল ময়দানে ॥
 আল্লাহ ইয়াদ মর্দ করে মনে ২ * এলাহী আলমিন আল্লা চাহেব

কামাল ॥ আওরতের হাতে আমি হইব বেহাল * আপনি মেহের
করে বাচাও আমারে ॥ নহেত ভেজিয়া দেহ আলি জোরওয়ায়ে *
হাসেন হাসেন দোন পায় সমাচার ॥ আসিয়া তল্লাস জেন করেন
আমার * পণ্ডহার খবর আজি বিবী ফাতেমারে ॥ ফাতেমা আমার
মাতা মদিনা সহরে * মরি কিবা বাচী আমি তাহে নাই দুখ ॥ জন্ম-
মের মত দেখী সবাকার মুখ * এই রূপে মনাজাত করে পাহালওয়ান
এলাহী জিবরীলে ডেকে করেন ফরমান * রছুলের বেটী জেন দেখে
স্বপনেতে ॥ হানিফা বেহালে আছে ফলানা মাঠেতে * সেতাবী
তল্লাস জেন করে হানিফার ॥ এই ঘড়ি দেও গিয়া এই সমাচার *
জিবরীল সুনিয়া ভেজে আর ফেরেস্তায় ॥ স্বপন দেখাইয়া আইস
বিবী কাতেমা ॥ * হানিফার রূপ ধরে ফেরেস্তা চলিল ॥ স্বপনে বিবীর
আগে কহিতে লাগিল * সুন ২ আক্কাজিউ কহী জে তোমারে ॥ না
কহিয়া আইব আমি টুঙ্গির সহরে * সোনাতান এসে মুখে জোরেতে
ধরিয়া ॥ ছলকুম উপরে ছুরি দিল ঢালাইয়া * আল্লার মেহের বলে
বাচি আমি তাই ॥ নহে মরিতাম আমি দেখা হৈত নাই * দেখিতে
এরাদা জদী থাকেত আমায় ॥ দোস্ত আর বেরাদরে কহিবে সবায় *
আপনী করিবে দোও সোন মা খাতুন ॥ স্বপনেতে কয়ে গেহু এ সব
কখন * ফাতেমা জোহরা বিবী চেতন পাইয়া ॥ উঠিয়া না দেখে
কারে তল্লাস করিয়া * স্বপন দেখিয়া বিবী কান্দে জারে জার ॥ কী
হইবে কেবা জাবে তাল্লাসে বাছার * আহারে হানীফা বাছা নয়নের
তারা ॥ হাসেন হোছেন শুনে কি কহীবে তারা * হজরত আলীকে
আমী কি বলে কহীব ॥ বিকিল বরসা মুখে কেমনে ছাড়াব * এলাহী
ভরসা বিনে আর নাহি চারা ॥ সুখনায় ডুবিল বুঝি মানিকের ভরা *
আফছোছ করিয়া মাতা করে হায় ২ ॥ হাসেন হোছেন দোন সুনবারে
পায় * দোন ভাই বলে মামা কেন কর খেদ ॥ ফাতেমা বেটার আগে
কহে সব ভেদ * দোন ভাই কহে মামা কেমনে জানিলে ॥ খোণাবে
দেখিহু আমি আজ রাত কালে * একথা সুনিল যদি ভাই দুই জন
ভাই ২ বলে দোহে করেন রোদন * কান্দিতে ২ দোন বাহিরেতে জায়
আহারে হানিফা ভাই রহিলে কোথায় * হায় ২ করে দোন লাগিল
কান্দিতে ॥ মছজেদে থাকিয়া আলী পাইল সুনীতে * বাহিরে আসিয়া
পুছে দোন এমামেরে ॥ কহিল তামাম বাত বাপের হুজুরে * সুনিয়া
হজরত আলি গেল মহলেতে ॥ ফাতেমার আগে বাত লাগিল কহিতে

ফাতেমা আলীর আগে কারণ জাহীর ॥ শুনিয়া কলেকায় লাগে আফ
 ছোছের তীর * কান্দেন হজরত আলীহানীফার তরে ॥ বারহ পেরে
 মান করিলে আমারে * কি হইবে কোথা জাব কে জাবে তল্লাসে ॥
 সমাচার কিসে পাব কেবা দীবে এসে * কান্দনা শুনিয়া সবে পুছিল
 আলীকে ॥ শুনিয়া হজরত আলী কহে একে * সকলে কহিল সাহেব
 কহি কদমেতে ॥ টুঙ্গীর সহরে জাব তল্লাস করিতে * কোমর বান্ধিয়া
 আলী কহে এই বাত ॥ রতুলের গোরে গীয়া কর মনাজাত * দোণা
 কর মহানুদ রতুল করিম ॥ ঘটয়াছে আশা পরে মুঞ্চিল আজীম *
 কবরের ধূল। সবে মলে নাক মুখে ॥ ফতে জেন পাই মোরা বল সব
 লোকে * তার পরে জায় সবে জতেক লঙ্কর ॥ ঘোড়ায় সওয়ার
 হয়ে টুঙ্গীর সহর * আপনি হজরত আলী হইয়া সওয়ার বেটার তল্লাসে
 জেতে হৈল রাহাদার * হাছেন হোছেন দোন বান্ধিল কোমর ॥ ঘো
 ডায় চড়িয়া জায় টুঙ্গীর সহর * এইরূপে মদীনাতে জে কেহ আছিল
 হানীফার তল্লাসেতে সকলে চলিল * মঞ্জেল রাহা জায় কত দিন
 টুঙ্গীর ময়দানে গেল জতেক মনী * নজর করিয়া সবে দেখে তাকা
 ইয়া ॥ জমীনে হানীফা মর্দ রয়েছে শুইয়া * হানীফারে কোলে লিল
 আলী জোরওারে ॥ সেতাবী আনীয়া দিল ফাতেমা হুজুরে * ফাতেমা
 দেখিয়া হাল করে হায় হায় ॥ কে দিল এতেক দুখ ধরিয়া তোমায়
 হাছেন হোছেন কান্দে বলে ভাই ॥ কহিল এখনি চল মদীনাতে
 জাই * কহিল হজরত আলী কে নারীল তোরে ॥ ময়দানে পাইল
 তারে দেই জম যরে * ফাতেমা কহেন সাহা গোশা নাহি হও ॥
 আপনি বাছাকে লীয়া মদীনাতে জাও * এতেক শুনিয়া সবে ফেরে
 সেথা হৈতে ॥ রওানা হইল সবে মদীনা জাইতে * কত দিন চলিল
 সবে রাহের উপর ॥ আসিয়া পড়িল সবে মদীনা সহর * মদীনাতে
 কত দিন গোজারীয়া জায় ॥ মহানুদ হানীফা মর্দ মায়ের আগে কর
 বিদায় দাওগো মাতা দেল খোসালীতে ॥ টুঙ্গীর সহরে জাই লড়াই
 করিতে * ফাতেমা কহেন বাবা খাও খানা পীনা ॥ লড়ায়ে জাইতে
 ভুঝে কে করিবে ম না * খানা পীনা খেয়ে মর্দ তৈয়ার হইল ॥ তার
 বেরাদর আগে বীদায় হইল * ঘোড়ার উপরে মর্দ সওয়ার হইয়া
 আরবার মায়ের আগে পড়িল জাইয়া * হানীফা মায়ের আগে
 করিল ছালাম ॥ দোণা কর নবীর বেটা পড়িয়া কালাম * বাহিরে
 আইল মর্দ হইয়া বীদায় ॥ টুঙ্গীর সহরে জান চড়িয়া ঘোড়ায়

এলাহী ভাবীয়া জায় দেল পেরেসান ॥ নামনে দেখিতে পায় বড়ই
 ময়দান * ময়দানে মর্দ নেকালীয়া জায় ॥ কত দূরে গিয়া বসে গাছের
 তলায় * সেখানে বসিয়া মর্দ ভাবে মনে মন ॥ সোনাভান নাম তার
 হইল সুন * দেলেতে আফছোছ করে হয়ে পেরেশান ॥ খানা নাই
 দীব ধড়ে থাকিতে এ জান * কেমন সে সোনাভান দেখিব তাহার
 এবার আমার আগে কেয়ছা ফতে পায় * একথা বলিয়া হানীফা
 গর্জিয়া উঠিল ॥ হাক দিয়া ঘোড়া পরে সওয়ার হইল * মার বলিয়া
 মর্দ উঠাইল ঘোড়া ॥ টুঙ্গীর সহর বীচে জাইয়া হৈল খাড়া * এয়ছাহাক
 মেরে চলে হানীফা মহাবলি ॥ জত লোক মোনে তার কানে লাগে
 তালী * জোর করে জায় মর্দ কুদীয়া ॥ টুঙ্গীর সহরে মর্দ পড়ছিল
 জাইয়া * সহর জাইয়া মর্দ মারে এক হাক ॥ গাধা ঘোড়া উট ভাগে
 দেখিয়া বিপাক * হাকের আওয়াজ তার জায় মোল কোম ॥ জে কেহ
 শুনিল হাক ছাড়া হৈল হুম * আরবার হৈদরী হাক হাকে পাহাল
 ওন ॥ তফাতে থাকিয়া সুনেন বিবী সোনাভান * সোনাভান বলে
 মোরে একী জানা হৈল ॥ নেড়ে মোহলমান বুঝি আবার আইল
 এইরূপে কথা মোনা করে সোনাভান ॥ দরজায় আসিয়া খাড়া হৈল
 পাহালওন * দরজায় আসিয়া মর্দ গোস্থায় জলিল ॥ লাভ মেরে
 পাহালওন কেওড় ভাঙ্গিল * হানীফা হাকৌল ফের সোনাভান
 বলিয়া ॥ সোনাভান সুনিয়া হাক উঠিল জলিয়া * বিবী বলে দেখ
 দাসী বাহিরে জাইয়া ॥ দেখ কোন মর্দ ডাকে সোনাভান বলিয়া
 কি জানী বালাই ফের কোথা হইতে আইল ॥ কোমর বান্ধিয়া মুখে
 দেখা দীতে হৈল * একথা বলিয়া বিবী করিল গমন ॥ হানীফার
 আগে গিয়া দিল দরশন * হানীফায় গোস্থা দাসী নজরে দেখিয়া
 সোনাভানের আগে গিয়া কহিল আসিয়া * দাসী কহে সোনাভান
 প্রান গেল উড়ে ॥ দরওয়াজায় আসিয়া খাড়া মক্যার সেই নেড়ে *
 হজরত আলীর বেটা হানীফা মর্দনা ॥ লড়িতে আইল ফের কাজে
 গেল জানা * একথা শুনিয়া বিবী বড় গোস্থা হৈল ॥ কোমর বান্ধিয়া
 ফের বাহিরে আইল * হাজার মনের গোজ্জ লিল ওঠাইয়া ॥ দশ মন
 লোহার টোপ ছের পরে দিয়া * মার বলিয়া বিবী গোস্থায় হাকিল
 দেখিয়া হানীফা মর্দ কুদীয়া উঠিল * হানীফা কহেন বিবী আসি
 যাছি ফীরে ॥ আজিকার জঙ্গে আমি দেখিব তোমারে * সেই দীন
 পাড়ীয়াছীর এলাহির সাপে ॥ নহেত আমার মাত পারে কার বাপে

সোনাভান বলে নেড়ে এত জোর ধর ॥ শুনিয়া আমার নাম এছা হাক
 মার * আমার দরওয়াজা তোড় মেরে একলাত ॥ কোন জোরে কহ
 ফের তকব্বরি বাত । হানিফা বলেন বিবী ডর কি তোমায় ॥ দাসি
 জে করিয়া তুখে বসাইব বায় * সোনাভান বলে নেড়ে দেখিব এবারে
 বেহার সাধ মেটাইব জয়কালির বরে * হানিফা বলেন এবে দেখিব
 তোমারে ॥ সাদি জে করিব তুখে আল্লা জদি করে * সোনাভান বলে
 তবে আগে আইস তুমি ॥ আজি তেরা বেহার সাধ মেটাইব আমি *
 একথা বলিয়া বিবী গর্জিয়া উঠিল ॥ সেকার উপরে জেন বাঘিনী
 ছুটিল * মার ২ বলে বিবী শুরু কৈল রন ॥ হানিফা বলেন আল্লা এ
 দেখি কেমন * কিছুই না বলে বিবী ঘোরে জেয়ছা চাক ॥ হানিফার
 কাছে এসে মারে একহাক * এছা জোরে হাক মারে বিবী জে আপনি
 হানিফার জান লিয়া হৈল টাটাটানি * এইরূবে সোনাভান চারিদিকে
 ঘোরে ॥ হানিফা বলেন আল্লা কি হইল মোরে * দাঙতে পাইয়া
 তারে বিবী সোনাভান ॥ হানিফার কোমর ধরে মারে এক টান *
 হানিফারে উঠাইল আপনার জোরে ॥ শুন্ততরে ঘোমাইল ছেরের
 উপরে * নাথার উপরে চাহে মারিতে কাছাড় ॥ বারোবারে আসে নেড়ে
 চূর্ণ করি হাড় * পটকান মারিতে বিবী ভাবে মনে মনে ॥ দুইবার বাটিল
 জে ফাতেমার নন্দন * নারি হৈয়া যদি আমি আছাড়িয়া মারি ॥
 লোকেতে বলিবে মন্দ পুরুষ বধ নারি * সোনাভান বলে নেড়ে না
 লড়িবে আর ॥ এহাতে কলঙ্ক কিছু না হবে তোমার * শুন্তেতে
 থাকিয়া হানিফা কহে এই বাস্ত ॥ না ছাড়িব জঙ্গ আমি থাকিতে
 হায়াত * আসক হইয়া আইনু টুঙ্গির সহরে ॥ আল্লার হুকুমে সাদি
 করিব তোমারে * সোনাভান বলে সোন সাহা আলির বেটা ॥ জোরে
 তুমি যেমন তেমন কথার বড় ঘট ॥ তবে নাম সোনাভান খেয়াতি
 রাখিব ॥ সিন্দুকে ভরিয়া তুখে দরিয়ার ডালিব * লোহার সিন্দুক বিবি
 আনে টান দিয়া ॥ সিন্দুকের মধ্যে তারে রাখিল পুরিয়া * সিন্দুকের
 কুঞ্জি তালা দিলেক আটিয়া ॥ কহর দরিয়া মাঝে দিল ভাসাইয়া *
 দরিয়ার বিচে হানিফা ভানিতে লাগিল ॥ খোয়াজ খেজের তাহা
 দেখিতে পাইল * হানিফা দরিয়া বিচে মারা জদি জায় ॥ কান্দিবে
 মদিনার লোক করে হার ২ * ফাতেমা আসিয়া যদি এই বাত পুছে ॥
 কি বলে জগাব আমি দিব তার কাছে * এতক ভাবিয়া তবে সিন্দুক

ধরিল ॥ সিদ্ধুক সমেত তারে কোলে ওঠাইল * সিদ্ধুক থাকিয়া
হানিফা আল্লাহ বলে ॥ খোণ্ডাজথেজের বলে বৈস মোর কোলে *
খাভেরজমা বৈস মর্দ সিদ্ধুক ভিতর ॥ কিবা ছার নারি দেখে হইলে
কাতর * ভুলিয়া আল্লার নাম দুখ পাইলে এত ॥ সোনাভান পরে তুমি
এত হলে রত * আল্লার রহম আছে তোমার উপর ॥ দরিয়াতে না
মরিবে সুন সে খবর * এই মত কথা যত বলিল খোয়াজ ॥ হানি-
ফার কানে তার পৌছিল আওয়াজ * হানিফা আরজ করে খোণ্ডাজের
পায় ॥ কে তুমি আমার কাছে কহনা আমায় * আমার কপালে আল্লা
এই লিখেছিল ॥ কহর দরিয়ায় বুঝি মগুত হইল ॥ খোয়াজ কহেন
বাবা না ভাবিও তুমি ॥ আল্লার রাহেতে পোস্তপানা আছি আমি *
জানিবে আমার নাম খোণ্ডাজথেজের ॥ আমার কোলেতে আছ ভাবনা
কিসের * এইরূপে বাতচিত করে দুই জন ॥ হেথায় ফাতেমা বিবি
দেখিল সপন ॥ সপনে দেখিয়া বিবি ওঠে চমকিয়া ॥ আন্দেসা করেন
বিবি এলাহি ভাবিয়া * দোন আথে আছু ঝরে হানিফা লাগিয়া ॥
কি হইবে কোথা জাব কে দিবে আনিয়া * কান্দিয়া আলীর আগে
কহে সনাচার ॥ শুনিয়া হজরত আলী হৈল বেকারার * বারেকার দুখ
দেয় সোনাভান নারী ॥ ভাসাইয়া দিব তারে এত বরাজুরি * কহর
দরিয়া মাঝে সিদ্ধুকের বিচে ॥ না জানি হানিফা মর্দ কোন হালে আছে
লোহার সিদ্ধুক বিচে হানিফাবে রাখে ॥ কুঞ্জি দিয়া ভাসাইল
সপনেতে দেখে * রওজা মোবারকে গিয়া কহে এই বাত ॥ দোণ্ডা
কর হানিফার বাড়ক হায়াত * গায়েব আওয়াজ দিয়া বলিল রচুল ॥
আল্লার দরগায় তেরা মোনাজাত কবুল * ওফার দারাজ তার ছালা-
মতে আছে ॥ তাল্লাস করিতে সবে জাও তার কাছে * হেন কালে
আইল দোন হাছেন হোছেন ॥ হানিফার বাত জত আলিকে পুছেন
কহিল হজরত আলী দোন এমামেরে ॥ মহাম্মদ হানিফা গেল টুঙ্গির
সহরে * হানিফা লড়িতে ছিল সোনাভানের সাথে ॥ হানিফাকে
ধরে বিবী ভরে সিদ্ধুকেতে * সিদ্ধুকে তরিয়া তারে ফেলে দরিয়ায় ॥
কহর দরিয়ার বিচে ভাসিয়া বেড়ায় * ছালামতে আছে মর্দ আল্লা
দোণ্ডায় ॥ টুঙ্গির সহরে গিয়া ঠেকিয়াছে দায় * হাছেন হোছেন
সুনে করে হার ২ ॥ কেমনে পাইব মোরা দেখিতে তাহার * আল্লা
কহিলেন আমি সেই দেশে জাব ॥ হানিফা কোথায় আছে নজরে
দেখিব * একথা বলিয়া আলী কান্দে জারে জার ॥ দোন ভাই বলে

বাবা না কান্দিও আর * হানিফার তল্লাসে লোক পাঠাইব আমি ॥ তাহার
 কারণে আর না কান্দি তুমি * বলেন হজরত আলী দোন এমামেরে
 মল্লিকা সমর্ত্তভান আর জৈগুনেরে * পাঠাইয়া দিব সবে টুঙ্গির সহর
 খাড়া হানিফার সহবে খবর * আওরতের সাথে জঙ্গ আরতের
 কাম ॥ আমি যদি লড়ি তবে হইবে বদনাম * এ কথা সুনিয়া দোন
 করিল গমন ॥ প্রথমে মল্লিকার আগে দিল দরশন * এমাম কহেন
 তুন মল্লিকা আকার ॥ বিদেশেতে মরে বুঝি খছম তোমার * আপনার
 খুবি চাহ জাহ নেকলিয়া ॥ হানিফারে আন গিয়া তল্লাস করিয়া *
 মল্লিকা কান্দিয়া কহে ভাই দুই জনে ॥ খছম মরিল মোর জানিলে
 কেমনে * মল্লিকারে কহেন বাত হাসেন হোসেন ॥ আমার মাতারি
 বিবী স্বপনে দেখেন * তাহার জবানি সূনে আইনু চলিয়া ॥ সেতাবি
 খবর লেও তোমরা জাইয়া * একথা সুনিয়া বিবী ছাড়িল ঘর বাড়ি
 বিবী ফাতেমার বাড়ি গেল দড়বড়ি * এমাম হোছেন কহে সোন
 গিয়া তুমি ॥ সেতাবি সমর্ত্তভানে ডেকে আনি আমি * একথা সুনিয়া
 দোন করিল গমন ॥ সমর্ত্তভানের আগেগিয়া দিল দরশন * অধিন রচিল
 পুথি রচুলের পায় ॥ কোমতে ডরাইবে আপনি খোদায় *

পয়ার * হানিফারে দেখে সবে কান্দে জারেজার ॥ এত দুঃখ ছিল
 সাহেব কপালে তোমার * হানিফা কহেন তোমরা জাও সবে ঘরে
 আরবার লড়িব আমি আল্লা জাহা করে * মল্লিকা কহেন সাহেব না
 হবে বেজার ॥ সোনাভানে দেখি মোরা কেয়ছা জোরওয়ার * কহিল
 সমর্ত্তভান মল্লিকা হুজুবে ॥ সোনাভানে দেখে জাব মদিনা সহরে *
 তার পরে কহে তবে জৈগুন সুন্দর ॥ বড় জোর ধরে সেই সোনাভান
 নারি * কহিল সমর্ত্তভান এত জোর রাখে ॥ আমার সওয়ামি মারে
 ডর নাহি তাকে * তবে নাম সমর্ত্তভান আলমে রাখিব ॥ বাম হাতে
 ধরে খোপা টানিয়া ছিড়িব * এহা যদি নাহি করি আপনার বলে
 বাপের পয়দাস আমি নাহি কোনকালে * এই কথা বলে সবে হয়ে
 একান্তর ॥ জাইয়া ঘিরীল সবে সোনাভানের ঘর * জাইয়া কহিল বিবী
 মল্লিকা আকার ॥ গহিরে আসিয়া দেখ বহিন তোমার * কালকের
 ছুড়ি তুমি হয়েছে জগান ॥ আসিয়াছি মোরা সবে দেখ বিদ্যমান *
 তুমিত বেগানা নহ মামাত বহিনী ॥ কি হালেতে আছ বিবি কহ
 দেখি সুনি * সোনাভান বলে নেড়ে নাহি তোরে ॥ পরিচয় দাও
 নহে ফিরে জাহ ঘরে * মল্লিকা কহেন তবে সোন সমাচার ॥ জম

রাজার কথা আমি মল্লিকা আকার * সোনাভান কহে তুমি যেমন
 হৈয়া ॥ কুটুম্ব হইয়া এলে কেমন করিয়া * জমরাজার ধরে হৈলনানে
 রাজার বেটি ॥ নিচু ঘরে জাত দিলে খোয় মাংস রুটি * মল্লিকা কহেন
 আমি মজাইবু জাতি ॥ বুঝিবে যে সোনাভান তুই বড় মতি * আমি
 যাহি মোরা সব তোমার লাগিয়া ॥ বাহিরেতে আইস তুরে জাইব
 দেখিয়া * নেয়ে হয়ে মরদের গলে দাও ছুরি ॥ কত জোর রাখ দেখি
 সোনাভান নারি * সোনাভান বাত শুনে জলিয়া উঠিল ॥ গোদায়
 মল্লিকা আগে যাইয়া পড়ছিল * সোনাভান বলে তোর কথায় জলে
 গা ॥ তোরনত কত দামি দাবে মোর পা * গোদা হৈয়া সোনাভান
 এই কথা বলে ॥ মল্লিকা শুনিয়া বাত চড় মারে গালে * চড় খেয়ে
 সোনাভান দেবে ধরে গলা ॥ মল্লিকা বলেন আজ্ঞা একি হৈল জালা *
 হাতহাতী করে দোন লড়ে জেন জম ॥ মস্তহালে লড়ে দোন কেহ
 নহে কম * এইমত লড়ে দোন কিছুই না খায় ॥ এয়ছাই বাইস রোজ
 গোজারিয়া জায় * জৈগুন হাকিয়া বলে মল্লিকারে বাত ॥ আর না
 লড়িবে তুমি সোনাভানের সাত * লড়িতে জাইব আমি জা করে
 খোদায় ॥ চুল ধরে লিয়া তুলে জাব মদিনার * এতেক বলিয়া বিবী
 কোমর বান্ধিল ॥ সোনাভানের আগে গিয়া হাজের হইল * জৈগুন
 কহিল হেকে সোন সোনাভান ॥ কলেমা পড়িয়া তুমি হও মুসলমান *
 সোনাভান বলে বিবী সোনগো জৈগুন ॥ তোমার কথায় মোর জলিল
 আগুন * একথা বলিয়া বিবী গর্জিয়া উঠিল ॥ হরিণি উপরে জেন
 বাঘিনী ছুটিল * হাতহাতী করে দোন কেহ নাহি ছাড়ে ॥ বাঘ
 আর মহিসেতে দুইজনোলড়ে * এইরূপে লড়ে দোন কিছুই না খায়
 রাত দিন আট রোজ গোজারিয়া জায় * রাত দিন লড়ে দোন হয়ে
 গলাগলি ॥ দেখিয়া গর্জিয়া উঠে সমর্তভান বলি * সমর্তভান কহে
 তুমি সোনগো জৈগুন ॥ তোমার লড়াই দেখে জলিল আগুন * কি
 প্রকার লড়ি তুমি বুঝিতে না পারি ॥ দুই জানের সাত লড়ে সোনাভান
 নারী * সোনাভান শুনিয়া কথা উঠিল জলিয়া ॥ সমর্তভানের তরে
 কহে ডাক দিয়া * তুমি যদি সমর্তভান এত জোর রাখ ॥ এদেরে
 পাঠায়ে দিয়ে ঘরে বসে থাক * থিমার ভিতরে তুমি রহিলে বসিয়া ॥
 মিছা মাট কর খালি ঘরেতে রহিয়া * সমর্তভান বলে আমি
 সহিতে না পারি ॥ জেই বাত বলে মোরে সোনাভান নারী * একথা
 কহিয়া বিবী হইল ভৈয়ার ॥ বাকিয়া গেল নিকটে তাহার

আল্লাহকে এয়াদ করে চলিল ময়দানে ॥ জৈগুন ফিরিয়া আইল হানিফা
 জেখানে * আসিয়া ধরিল বিবী সোনাভানের তরে ॥ বাঘের শিকার
 জেন ছাগল উপরে * আল্লার নামেতে তার হয়ে গেল জয় ॥ জোরেতে
 ধরিয়া তারে মারিয়া গেরায় * হানিফা কানিয়া বলে সমন্তভান
 তরে ॥ জার তরে এত দুক্ষ খুন কৈলে তারে * সোনাভান আজ
 জদি মরে একবারে ॥ সোনাভান মরীলে আমি বেহা করি কারে *
 মল্লিকা দেখিয়া কহে সমন্তভানেরে ॥ জার তরে এত দুক্ষ খুন কৈলে
 তারে * সওয়ামি আসক হয়ে লড়ে বারেবার ॥ মানুষকে মারিলে তার
 হব গোনাগার * মল্লিকার কথা শুনি হুসিয়ার হইল ॥ সোনাভানের
 তরে তবে কহিতে লাগিল * কি হইবে সোনাভান কহগো আমারে
 সওয়ামি আসক আছে তোমার উপরে * খুসিহালে হও জদি সওয়ামির
 পীরারি ॥ তবে ত তোমার তরে নাহি আমি মারি * সোনাভান বলে
 বিবী কহিজো তোমায় ॥ নবির কলেমা তোমরা পড়াও আমায় *
 কলেমা পড়িয়া আমি দাসী হয়ে রব ॥ তোমাদের সাথে আমি যদি-
 নাতে জাব * একথা শুনিয়া পরে খোসাল হইল ॥ হানিফার কাছে
 সবে জাইয়া কহিল * সোন-পাহলভান মোবারক বাদী ॥ সোনাভান
 কবুল আছে দিব তোমার সাদী * হানিফা কহেন সোন সমন্তভান
 বিবী ॥ সোনাভানের পাসে বৈস দেখা জাউক খুবি * বাঘের মতন
 চোক আড়ে চায় ॥ সোনাভানে দেখে মোর প্রান উড়ে জায় * একথা
 সুনিয়া তারা হাসিয়া উঠিল ॥ সোনাভানের চারি দিকে ঘিরিয়া বসিল
 তিন বিবী আরজ করে হাত ওঠাইয়া ॥ হুজুরের কাজি আল্লা দেহ
 পাঠাইয়া * কবুল হইল দোণা আল্লার দরগার ॥ হানীফার সাদি
 দিতে ফেরেস্তা পাঠায় * আসা হাতে খেলকা গায় আইল একজন ॥
 হানিফার কাছে গিয়া দিল দরশন * ফকির জানিয়া হানিফা ছালাম
 জানায় ॥ দোণা করে জিবরাইল দস্ত দিয়া গায় * ফকিরের আগে মর্দ
 কহে তাকাইয়া ॥ আপনি আমার সাদী দেহ পড়াইয়া * একথা
 শুনিয়া পীর কলেমা পড়ায় ॥ বুড়িকে ডাকিয়া মর্দ এই বাত কয় *
 বাদমাই করহ বুড়ি তক্ত পরে বৈসে ॥ আমরা চলিয়া জাই আপনার
 দেশে * সোনাভানে লয়ে সবে করিল গমন ॥ মদীনা সহরে গিয়া
 দিল দরশন * আল্লা বল সবে জত মনিগন ॥ তানাম হৈল পুথি
 শোন সর্বজন *

* ইতি তামাম মোদ *

কেতাবের বিজ্ঞাপন ।

দাওয়াতে মছহুনা	*	কোমাজি নারী
তাজ ছোলেমানী	*	তেলেছমাত ছোলেমানী
নেয়ামতে দুনিয়া	*	চামানে নাওবাহার
ফানার দুনিয়া	*	ছাখাওত নামা
কমলাপরী জানেজাহা	*	সেখ ফরিদ
মাহাজাদার পুথী	*	দেল দেওনা
এলাজল ফোকারা	*	মেছবাহল এছলাম
নলিতার পুথী	*	খএর বরকত
চৌদ্দ উজির	*	জিন্নতল কুঞ্জি
আহকামল মোছলেমিন	*	দেও নামা
সুরুজ জানালগাজী	*	নক্সে ছোলেমানী
হাদিছ আরবাইন	*	ছহি তালেনাখা
আখের জমানা	*	নহিহতমেছা
দুলা দুলহেনের খেলা	*	পীলতন রোস্তম
আজাএবল ওজুদ	*	ছেরাতল মোমনিन
হেরজে ছোলেমানী	*	রশনেছা
তজহিজ তকফিন	*	বিরাগুরু
ওস্মর ওস্মিয়া	*	হীরক খমি
আহকামচ্ছালাত	*	খএবর জঙ্গনামা
মোলুদ শরিফ	*	কেছাছল আশ্বিয়া
আজাএব ছোলেমানী	*	শরেবেকায়া
কটু মিঞা	*	আলেক লাএল
মওভ নামা	*	কেয়ামত নামা

আমার দোকানে আরবী, ফারছী, উর্দু, বাঙ্গালা পুথী পুস্তক ও কুলের পাঠ্য বই, গ্রীহট্ট নাগরী মাদ্রাসার কেতাবাদি অতি সুলভ মূল্যে পাওয়া যায়, পত্র লেখিলে ভি পিতে ও অতি সুলভ দরে শীঘ্রই পাঠাইয়া থাকি পরীক্ষা প্রার্থণীয়।

অলিউল্লা মতওল্লী চওবেক মসজিদ

ঢাকা—উক্ত মসজিদের নীচে কেতাবের দোকান।